

«Il temp dals retgs»

La Frantscha instruescha l'atgna istorgia

DA GUIU SOBIELA-CAANITZ

■ **«Le Monde» dals 29 d'avust ha gist publictà ils novs programs liants d'istorgia per la scola primara e secundara da la Frantscha metropolitana (63920247 olmas). Quels programs valan sin l'entir intschess, da la Mar dal nord a las Pireneas catalanas, dal Mont Blanc a l'insla d'Ouessant, senza emblidar la Corsica.** I valan pia sin 543965 km² per l'entira populaziun franzosa ed extra obligada d'ir a scola. I mussan co ch'il stadi chapescha il passà da sia metropola, la pli vasta da l'Uniuin europeica. Questa è menziunada en il program istoric per il «Cours moyen deuxième année» (CM2), la classa la pli auta da la scola primara: «La France, des guerres mondiales à l'Union européenne». Il segund aut, quel dal «Cours moyen première année» (CM1), entschaiva cun il temp «avant la France» (Celts, Gals, Grecs e Romans); lura vegnan Merovings e Carolings, pia retgs ed imperaturs cun Carl il Grond († 814). Lez, retg e lur imperatur «avant la France», dominava t. a. l'entir intschess che furma oz la Frantscha, danor la Corsica ed il Pajais Basc: «Il 778 ad Orreaga/Roncesvalles [Navarra] han ils Bascs terrà la retroguardia da Carl il Grond che turnava da la bloccada da Zaragoza [vasala da l'emir da Córdoba] (1).» Quai è il tema d'in poem epic en franzos medieval, la famusa «Chanzun da Roland» (11avel tschientaner), nua ch'ils Bascs vegnan Saracens.

Da Carl il Grond al 13avel tschientaner

Ils Carolings possedevan ina part impurtanta da l'Europa. Era la Rezia era carolingia. «Il 773 ha Carl il Grond clamà uvestg Constantius sco rector, pia administratur civil da la Currezia. Lez ha pia prendi part da la fundaziun da la claustra da Müstair (...). Il pli plausibel para ch'il retg haja dà l'impuls ed insaquants meds finansials e che l'investg haja stuì procurar per la realisaziun» (2). Suentar ils Carolings cun lur vast imperi fa il program scolastic istoric dal CM1 dentant in grond sigl cronologic e geografic. Il paragraf «Le temps des rois» entschaiva cun Ludovic IX (1214–1270, «Saint Louis»), naschì sper Paris 400 onns suenter la mort da Carl il Grond. Il reginam da Frantscha era bier pli pitschen che la metropola franzosa d'oz. Lezza dumbra oz quindesch citads cun dapli che 100000 olmas; diesch da questas (2) na faschevan 1270 betg part dals pajais da la curuna u dals possess d'Alfons da Poitiers (1220–1271), frar dal retg e cont da Toulouse, mort senza ertavels. Ils uffants dal CM1 en lezzas citads e lur conturns na survegnan pia nagina instruziun d'istorgia regiunala areguard il 13avel tschientaner.

Flams e catars

Lille (per flam Rijsel) fascheva part lezza giada dal contadi da Flandra; il 1255 ha la populaziun retschavì il retg cun insultas ravgiatadas. Il conflict tranter la curuna e las milizas da purs e mastergnants flams ha s'agravà cun Filip IV (1268–1314), biadi da «Saint Louis». Il 1302 a Kortrijk ha l'infantaria da las mastergnanzas terrà ils chevaliers franzos («Guldensporenslag/battaglia dals sparuns d'aur»). Dante Alighieri (1265–1321) numna «Lilla» (Purgatorio, XX, 46) cun far allusiun als malfatgs da retg Filip en Flandra. Encunter sid è il contadi da Toulouse stà la gronda acquisiziun da «Saint Louis» e da ses frar Alfons. Lur bab Ludovic VIII (1187–1226) aveva pinà quai conquistond il Poitou e l'entir pajais fin Montpellier, profitond da l'uscheditga «cruschada cunter Albi». Ils «catars» («purs») da derivanza balcanaisa eran «ina cuntrabaselgia cun dogmatica speculativa, ferma oravant tut en il Languedoc cun sis uvestgieus e lur chapitala Al-



Il retg Louis XIV.

MAD

bi (...). Las citads eran in terren favuravel, perquai ch'ins pudeva far appel a la paupradad da vastas populaziuns ed als remors da conscienza da burgais pussants (...). Il 1207 ha papa Innocent III scomunitgà l'inflexibel cont Raimund da Toulouse (...). Ils guerriers che han suandà il clom da cruschada eran uschè blers, cunzunt da la Burgogna, l'Ille-de-France e la Normandia, ch'i han pudì conquistar Béziers (...) il 1209. Là hani mazzacrà l'entira populaziun; quai ha talmain spaventà ch'ins ha surdà senza cumbar bleras citads e fortezzas» (4). Il 1237 ha Alfons maridà la figlia dal cont da Toulouse; suenter lur mort 1271 ha la curuna ertà il cuntadi. La cruschada ha destrui la cultura occitana medievala.

Renaschientscha e schisma

Il program istoric dal CM1 franzos resguarda dus retgs dal 16avel tschientaner naschids lunsch davent da Paris:

– Francestg (*Cognac 1494 – †Rambouillet 1547) «protectur da las scienzas umanas e dals arts»,
– Andri IV (*Pau 1553 – †Paris 1610) «l'edict da Nantes».

Lur possess cumpigliavan set citads grondas d'oz dapli che durant il 13avel tschientaner: Bordeaux, Lyon, Marsiglia, Nantes, Reims, Rennes e Toulon. Francestg enconusch'ins en Svizra sco il victur da Marignano (1515). El è dentant stà in dals paucs retgs franzos che n'han betg schlargià il territori dal reginam. En lez intschess ha'l applitgà la norma formulada il 1492 da l'umanist spagnol Elio Antonio de Nebrija (1441–1522): «Siempre la lengua fue compañera del imperio» («Prólogo a la gramática de la lengua castellana»). Il 1539 a Villers-Cotterêts (Picardie) ha retg Francestg stipulà ch'ins duaja «prononcer et expedier tous actes en langage françois» (art. 111). El protegeva poets e scripturs; Leonardo da Vinci (1452–1519) ha giudì sia ospitalità enfin a la mort. Retg Francestg ha promovì la construcziun da chastels, cunzunt sper il flum Loire u in flum lateral. «Les châteaux de la Loire» fan part dal patrimoni cultural mundial da l'Unesco. Tgi sa sche la vita da retg Andri IV ha inspirà quella da Gieri Genatsch (1596–1639)? Il 1590, sco schef da la partida ughenotta ed ertavel legitim da la curuna franzosa, ha Andri battì l'armada catolica. Lur ha'l chapì ch'el na vegnia mai

renconuschì sco retg reformà d'in pajais cun maiorità catolica. El ha pia convertì, è vegnì curunà ed ha firmà l'edict da Nantes a favur da la minorità protestanta: «Libertad da cult limitada, ma garantida, access a mintga dignità ed uffizi, dretgiras confessionalmain maschadadas per chaussas en litas tranter catolics e protestants» (5).

Louis XIV

Il davos retg da la Frantscha menziunà dal program istoric per l'instrucziun primara (CM1) e secundara I («cinquième») è Louis XIV (1638–1715) cun la menziun: «Le roi Soleil à Versailles». Dapi 1682 residiaiva la curt dal retg en il nov chastè da Versailles; l'emblem dal sulegl simbolisava la pussanza dal retg. Lez per nus è probablmain ina da las figuras las pli negativas dal passà franzos. Quai era gia stà il cas lezza giada: «L'abrogaziun da l'Edict da Nantes (1685) e las persecuziuns dals ughenots ordinadas silsuenter da Louis XIV han incitè il 1693 plirs uffiziers grischuns a sa render cun lur truppas en servetsch da l'Olanda, da la Spagna, da l'Austria e dal Piemunt» (6). Meyers Konversations-Lexikon, tom 11 (5avla ediziun, 1896) rapporta: «L'emprim han ins limità il pli pussaivel ils dretgs dals protestants; ins ha difficultà la celebrazion da lur cults divins, sfurzà conversiuns en massa, finalmain abolì tuttafatg l'Edict da Nantes (...). 200000 fugitivs han bandunà la Frantscha (...). Louis ha la finala vilentà cunter sai quasi l'entira Europa (...). Il 1697 ha la pasch da Rijswijk surlaschà ad el l'Alsazia e Strassburg, ma el ha stuì restituir la Lorena, il Luxemburg, la Brisgovia e la fortezza alpina da Pinareul/Pinerolo [Piemunt]» (p. 561). Cur ch'el è mort devi pia anc adina ils ducadis independents da Lorena e Savoia; quista cumpigliava t. a. las citads da Turin, sia chapitala, e Nizza.

1. Emmanuel Le Roy Ladurie, *Histoire de France des régions*. Ediziun da giaglioffa. Paris (Seuil, ISBN 2-02-04158-2) 2005, p. 110.

2. Jürg Goll ed alii, *Müstair*. Turitg (Neue Zürcher Zeitung, ISBN 987-3-93823-324-4) p. 31.

3. Bordeaux, Lille, Lyon, Marsiglia, Nantes, Nizza, Reims, Rennes, Strassburg, Toulon.

4. Wilfried Loth, *Frankreich-Ploetz*. Friburg en Brisgovia e Würzburg (Ploetz, ISBN 3-87640-304-9) 1985, p. 94.

5. Wilfried Loth (sco nota 4), p. 149.

6. Martin Bundi en: *Stiftung Historisches Lexikon der Schweiz (HLS), Lexicon Istoric Retic*, tom 1. Cuira (Desertina, ISBN 978-3-85637-390-0) 2010, p. 378, chavazzin «Frantscha».